

## Kristo Mwangalizi wa Milele

*Kwa malaika wa kanisa lililoko Efeso andika; Haya ndiyo anenayo yeye azishikaye hizo nyota saba katika mkono wake wa kuume, yeye aendaye katikati ya vile vinara saba vya dhahabu. Nayajua matendo yako, na taabu yako, na subira yako—*

**Ufunuo 2:1, 2.**

**P**icha inaonesha uangalizi wa milele. Yesu yuko katikati ya vinara saba vya dhahabu, akitembea kutoka kanisa hata kanisa, toka kusanyiko hata kusanyiko, toka moyo hata moyo. Yeye awahifadhiye Israeli hatasinzia wala hatalala usingizi. Kama vinara vya taa vingeachwa katika uangalizi wa wanadamu, ni mara nyingi jinsi gani nuru ingefifia na kuzimika! Lakini Mungu hajaiacha kazi Yake katika mikono ya wanadamu. Yesu, Yeye ambaye aliyatoa maisha Yake kwa ajili ya ulimwengu, ili kwamba wote wamwaminio wasipotee bali wawe na uzima wa milele, ndiye Mlinzi wa nyumba. Yeye ni Mlinzi mwaminifu na wa kweli wa nyua za Bwana.

“Haya ndiyo anenayo yeye azishikaye hizo nyota saba katika mkono wake wa kuume.” Maneno haya wanaambiwa walimu ndani ya kanisa—wale waliokabidhiwa na Mungu majukumu mazito. Mvuto maridadi ambao unapaswa kuwa mwingi kanisani umefungamana na watumishi wa Mungu, ambao wanalazimika kudhihirisha upendo wa Yesu wa thamani. Huzitawala nyota za mbinguni. Anazijaza nuru. Anaongoza na kuelekeza mjongeo wao. Kama asingefanya hivi, zingekuwa nyota zilizoanguka. Ndivyo ilivyo kwa wachungaji Wake. Wao ni vyombo mkononi Mwake na yote mema wanayotimiza hufanyika kwa uweza Wake. Nuru Yake inapaswa kuangaza kupitia kwao. Mwokozi anapaswa kuwa ufanisi wao. Kama watamwangalia kama Alivyomwangalia Baba Yake, wataifanya kazi Yake. Kadiri wanavyomtegemea Mungu, ndivyo atakavyowapatia mng’ao Wake ili kuangaza kwa ulimwengu.

Kristo hutembea katikati ya makanisa Yake kwa urefu na upana wa dunia. Anatazama kwa shauku kubwa kuona kama watu Wake wapo katika hali ya kiroho kiasi kwamba wanaweza kuendeleza ufalme Wake. Yupo katika kila kusanyiko la kanisa. Anawajua wale ambao Anaweza kuijaza mioyo yao kwa mafuta matakatifu, ili kwamba waweze kuwapatia wengine. Wale ambao wanaitekeleza kazi ya Yesu kwa uaminifu, wakiwasilisha kwa maneno na matendo tabia ya Mungu, hutimiza kusudi la Bwana kwa ajili yao na Kristo anawafurahia.

“Nayajua matendo yako, na taabu yako, na subira yako.” Kristo anajua historia na uzoefu wa kila mmoja aliyempokea. Huwaambia watu Wake, “Nimekuchora katika vitanga vya mikono yangu; kuta zako ziko mbele zangu daima.” Kwa umakini mkubwa huthamini kila tendo la upendo na uvumilivu walilolifanya.... Kristo huzishikilia nyota katika mkono Wake wa kuume na ni kusudi Lake kuruhusu nuru Yake iangaze ulimwenguni kupitia kwao. Hivyo ndivyo anavyotamani kuwaandaa watu Wake kwa ajili ya ibada ya juu katika kanisa la mbinguni.... Hebu na tuoneshe maishani mwetu kile ambacho neema ya Mungu inaweza kuwafanyia wanadamu (The Review and Herald, Mei 26, 1903).